



Lis storiis di Zuan Semençute

contadis ai frutins de Scuele de infanzie

1. Cui isal Zuan Semençute?

*Propit gnove la storiute
che achì e sta par scomençâ
di un frutin, Zuan Semençute
e di chel che al fasarà:
al è lui te sô scunute
la sô mame e il so papà
dentri alì lu stan cirint
par cjatâlu, cu la lint!*

Zuan Semençute al è un frutin piçul. Ma no piçul come un frut de scuele de infanzie, e nancje come un fradissut a pene nassût: no, une vore plui piçul.

Pensait: il so vêr cognon nol è Semençute, ma un altri, di chei plui normâi intal so paîs. Ma ducj lu clamin Semençute, par vie che al somee propit une Semençute di frut, come une di chês semençutis che a si cjatin intai meluçs.

Cuant che al è nassût, al jere tant picinin che no lu cjatavin plui. I mediis e lis infermieris a àn scugnût cjoli prime i ocjai e dopo une lint par cirîlu inte scune dulà che lu vevin poiât par fâlu braçolâ de sô mame.

A proposit: la sô mame si clame Marie e so pari si clame Stieffin.

Cuant che Marie e Stieffin a son tornâts a cjase a àn dit:

"No podìn stâ simpri a cirî Zuanut ogni buinore inte scune cu la lint, e magari al è sot dal cussin o sot la plete dal linçûl. Al è miôr che si proviodin intun altri mût".

Stieffin, il pari di Zuanut, al jere propit brâf a fâ su robis cul *Legó*. Al faseve di chês costruzions dificilis: avions, camions, pacaris, tratôrs... al diseve simpri:

"Cuant che al nassarà il frut al varà alc di podê zuiâ, cun dutis lis machinis di *Legó* che i ai preparât!"

Marie, la mame, e riduçave parsot, cjantuçant:

"Cu la scuse di preparâ lis robis par Zuanut, tu Stiefin tu zuis come un frut"

Intant e gugjave par fâ lis scarpute di lane pal frutin.

Se e ves savût! Intune scarpute di lane al steve dentri dut Zuan e ancjemò al vanzave puest pe code dal gjatut di cjase!

Intant Stiefin al lavorave cui *Legos* e .. ce aial fat? Une biel scunute di *Lego*, dulà che la mame Marie e à poiade dentri la scarpute di lane echel al è diventât il jet di Zuanut.

Di fat Zuan al è grant propit come un pipinut di chei dal *Lego*, dome che nol à la muse colôr zâl.

Cussì duncje al duar il piçul Zuan: intune scunute fate cui *Legos* ros e blancs, cun drenti la sô scarpute di lane celeste, che e fâs tant di cuvierte che di materàs.

La scunute e sta poiade sul scabel dongje dal jet grant di mame e papà, e lôr, a turni, lu nicin cu la man vie pe gnot, fin che Zuanut no si indurmidìs.

Sot de scunute a tegnin poiât un vignarûl, se mai a Zuan i scjampe la pipì vie pe gnot.

2. Ce mangjial Zuan Semençute?

*Al à fan Zuan Semençute
e al vorès alc di mangjâ
cuntun rîs e un sclip di agute
la sô panze al jemplarà
di meluç une fetute
par trê dîs i bastarà...
par la angurie, une passion!
ma ce grande confusion!*

Zuanut al à simpri fan.

La robe che i plâs di plui di mangjâ al è il rîs: cuant che o dîs il rîs, o vœi dî propit un rîs, un sôl che la mame i fâs cuei intun taponut di bire poiât parsore di un fulminant di len.

Cuant che il rîs al è diventât tenarut, jê lu cuince cuntune gote di vœli e Zuanut lu mangje cun grande sodisfazion.

Timp dîs minuts e il risut al è dal dut finît e Zuanut si russe dut content la panze plene.

Cualchi volte, tant par cambiâ, la mame i fâs une buine mignestre cuntun fasuli e un fruçon di patate. In chês voltis, tocje dilu, al frut i scjampe cualchi puçute...

Un altre robe che i plâs a Zuan Semençute a son lis pomis: un bon gran di ue, mieç a la volte, un pagnut di cocule, une fetute di meluç...

Une volte il papà al veve puartade a cjase une angurie.

Al jere Istât e lui e la mame a pensavin di gjavâsi la sêt cuntune bieles fete di angurie, rosse e dolce.

Par provâ se la angurie e je buine, savêso ce che si fâs? Si fâsi une buse cul curtis e si tire fûr un tocute: se il tocute al è ros e dolç, la angurie e va ben; se al è smavît o colôr di rose, la angurie no je propit par la cuâl.

Bon: la mame, cul curtis, e fâs une buse in forme di triangul e e tire fûr un tocute di angurie. Il papà la cercje: e je propit buine!

"O podaressin fale cercjâ ancje a Zuanut: o tirin fûr un gucjarinut di polpe e lu clamìn a supâlu.... Ma, dulà isal Zuanut?"

"Ma, al jere achì cumò denant... Zuanut, Zuanut dulà sêstu?"

Clame, cîr, cjale pardut ma il frut no si lu cjate in nissun lûc.

"Zuanut, Zuanut dulà sêstu?"

La mame e il papà a cjalin sot de taule, su lis cjadreis, sul pavement, intal scjatulon dai zugatui: nuie!

A scomençavin zaromai a preocupâsi, cuant che a àn sintût une vosute saltâ fûr da la panze de angurie: "O soi culi, o soi jentrât de buse e o ai cercât la polpe: ce buine!"

In chês sere Zuanut al à mangjât juste chel fregul de angurie, propit cjapât su dal cûr... ma ce indigestion!

Al è lât a durmî inte sôs scunute rosse e blancje plen di mâl di panze e la mame e à scugnût dâi ancje une gote di camomile!

E dopo, fra la angurie e la camomile, al à fat pipì dute la gnot!

3. I zugatui di Zuan Semençute

*Velu il frut dut impegnât
cui zugatui a zuia
nancje un euri a àn costât
che ju à fats ducj il papà:
svelt a cjase al è tornât
par podêju fabricâ.
Gjildo, il pes, lu cjale intant:
denti l'aghe al sta nadant*

A Zuan, come a ducj i fruts, i plâs une vore di zuiâ. Soredut la sere, cuant che so pari al torne di vore, si tache intor di lui, cjapantlu par une gjambe dai bregons fintremai che l'om nol si met a fâi cualchi zugatui e a zuiâ cun lui.

Soredut, par costruî un zugatulu il siôr Stiefin (cussì si clame il pari di Zuan) al dopre lis costruzions dal *Lego*.

E propit cun chês al à preparât une machinute, rosse e zale, una moto verde e una bieles pacare che si môf di bessole su lis ruedis di gome.

Zuan, cu la pacare al cjape su i fruçons che a colin jù de taule e ju puarte inte scovacere. Cu la machinute al zire svelt svelt ator dai pîts de taule e al impie i ferâi par fâsi un pocje di lûs alì sot.

I zugatui plui bieï a son però chei che il siôr Stieffin al prepare cun ramaçuts di arbui e stecuts di len.

Cun cuatri stechedincj, dutune cun dôs fueis di morâr, al à preparade une biele tendute, come chês dai indians, e alì al jentre dut content il frutin corint cu la moto verde e fasint *vrum vrum* cu la bocjute.

Cuntune scusse di mieze cocule il papà i à preparade ancje une barcjute par lâ indenant inte vascje di bagn, remant cuntun gucjarinut di chei che si mangje il gjelât.

Un altri biel zugatul al jere un biel pirlì di len piturât: lui al monte parsore, si ten dûr intor dal mani e so pari i dà une biel sgurlade: Zuan al rît dut content e nol dismetarès mai chel zuc alì.

La robe però che i plâs plui di dut e je una altre: chê di nadâ drenti une boce di veri insieme cuntun pes ros.

Il pes ros al jere stât vinçût tancj ains prime dal papà Stieffin inte sagre di Sante Catrine di Udin, e lu veve dât a Marie cuant che a jerin ancjemò morôs. A vevin comprade une boce di veri, taronde, cun dentri doi bieï claps sbusâts e une alighe rosse.

Mame Marie a buinore i cambie la aghe a Gjildo (cussì a vevin clamât il pes ros, par vie che al someave un fregul a un barbe di Marie) e i butave drenti un fregul di polvarine grise che e jere avonde par gulizion, gustâ, mirinde e cene. Plui tart Zuanut al jentre inte boce de aghe e si met a nadâ cun Gjildo.

I doi a son diventâts propit amîs fra di lôr e a fasin tombulis e zirevoltis dentri dal aghe. Cualchi volte Zuan si scuint framieç i claps che a stan sul font de boce e il pes, cu la bocje vierte e i voi scocolâts fûr, nol capis mai dulà che al è lâ.

No son tant furbos, i pes!

Daspò la mame e tire fûr il frutin e lu suie cuntune maneçute di lane.

Une volte Zuan al à volût puartâ fûr dal aghe Gjildo par fâi viodi i soi zugatui e cussì lu à sburtât fûr de boce di veri.

Par fortune che la mame Marie e je stade pronte a tornâ a meti il pes inte aghe, che al veve bielzà scomençât a tirâ il flât a grops!

4. Une biele di

*Te sachete da la tute
dal papà l'â fat pipì!
ma la robe je plui brute:
lui 'nol veve di jessi alì!
Cumò intant Zuan Semençute
'l à cjatât un gnûf amî:
Çuf si clame l'ucielut
che lu fâs svolâ pardut!*

Une biele di Zuan Semençute si è dismot a buinore.

Al sintive che in cusine la mame Marie e il papà Stiefin a fevelavin sot vôs, crodint di no dismovilu, e a disevin:

"Stiefin, ti tocjial propit a ti di lâ a viodi di chel fûc che al è daûr a brusâ il bosc in montagne?"

"Sì mo, Marie, tu sâs che chest al è il gno mistîr!"

Il mistîr di Stiefin al jere il pompîr. Cuant che e succedeva une disgrazie: fûc, aghe, incidents di machine, lui si meteve la tute e i stivai, l'elm sul cjâf e al scugnive cori a judâ la int e a salvâ lis cjasis.

"No stâ a lâ intai pericui e cîr di tornâ a cjase prin che tu puedis. E cumò no stâ a fâ sunsûrs che Zuanut al duar."

Ma Zuanut nol durmive: al veve sintût dut il discors e a colp al à decidût di fant une des sôs: di lâ la dutune cun so pari a viodi il fûc intal bosc.

"No ai mai viodût un grant fûc di dongje: cuissà ce biel che al è!" al pensave Zuanut

Naturalmentri se al voleve lâ a viodi il fûc al scugnive fâ dut di scuindon, che ni il papà ni la mame lu varessin lassât lâ intai pericui.

Cussì Zuanut si à involuçât intal façolet di nâs dal papà che Stiefin al veve pojât su la taule, e cuant che lu à cjapât su al jere il frutin dentri, e cussì lu à metût inte sachete.

In chest mût Zuan Semençute si è cjatât propit drenti te sachete de gjachete de tute dal papà!

Inte sachete il piçul al à cjatât un biel cjaldut e un grant scûr: cussì si è indurmidît di gnûf dut, ben involuçât intal façolet.

Biel che al durmive si insumiave di nadâ cun Gjido, il so amì pes, e i pareve di jessi intune grande aghe... tante ma propit tante aghe che lu bagnave dut.

A colp si è dismot e cussì si è visât che al veve fate la pipì intor, bagnant dut il façolet: chê e jere la aghe che si veve insumiât!

Intant il camion dai pompîrs, colôr ros e arint, cu la sirene blu e rosse, al jere rivât intal bosc dulà che al jere nassût il fûc che al brusave la jerbe e i arbuluts.

I pompîrs a colp a àn tirade su la pompe de aghe e, vie! a àn scomençât a sborfâ sul fûc, fin che, a fuarce di aghe, lu àn distudât.

Cul stâ dongje dal fûc a papà Stiefin i jerin vignûts intor i sudôrs: cussì al à cirût inte sachete il façolet par suiâsi il cerneli.

Ma tirant fûr il façolet, che al jere dut bagnât, al à sintût che al jere ancje alc che si moveve dentri..

"Po ce fâstu achì Zuan? No jeristu a durmî?" al à domandât Stiefin viodint a saltâ fûr chel birbant di so fi.

"Scuse, perdon papà: jo o volevi cjâlâ cemût che si distude il fûc: o sês stâts propit brâfs, ma ce cjalt che al è achì!"

Dut fat ator dal camion dai pompîrs e jere ancjemò cualchi bore di len, e pardut si sentive un gran cjalt.

Il papà Stiefin nol saveve ce di a chel frutin disubidient che si jere metût intun grant pericol. E se al fos colât fûr dal façolet vie che a tiravin la aghe sui arbui che si brusavin? Al podeve fâsi une vore di mâl!

Stiefin al scomençave a dî: "Cumò Zuanut tu âs di stâ fer alì, che ca di un pôc o lin a cjase... ma dulà sêstu lâ cumò, lazaronat?"

Zuan Semençute al jere di gnûf sparît!

Il papà e ducj i pompîrs si son metûts a cirîlu, sgarfant in dutis lis lôr sachetis, cjalant fintremaî drenti lis pompis, sul camion, par tiere framieç i claps,.. cuant che a àn sintude la vosute dal frut che e vignive di par aiar:

"O soi achì cul gno gnûf amì Çuf! O soi sentât su la sô schene!

Ducj a cjalin par aiar e a viodin un ucielut, di chêi verts e zâi cul çuf di plumutis neris sul cjâf, insumis une parussule.

Parsore de schene al puartave un frutin piçul piçul... propit lui, Zuan Semençute!

"Papà, scoltimi: Çuf al à pierdude la sô cjasute intal fûc. Al jere a stâ intun nît sul ramaç di un arbul che però si è brusât.

Podìno puartâlu a cjase nestre? Tu tu puedis fâi une cjasute intune scjatule di scarpis e metile dongje de mê scunute...

Cussì Stiefin al è tornât a cjase cun Zuan e Çuf intune sachete.

Il façolet bagnât di pipì lu à metût in chê altre.

5. il complean

*Une fieste e ven par Zuan
cu la torte e cui lumins
Al è vuê il so complean,
ma dulà sono i frutins?
A no 'nd è, no vignaràn
nol à amiis, fradis, cusins.
Par il pes e par l'uciel
il moment nol sarà biel!*

Ce fiestone! Vuê Zuan Semencute al finìs i ains: ancje lui, come ducj i fruts, al vûl fâ une fieste di complean e soledut cjapâ tancj regâi par disvoluçâiu un a la volte e dopo zuiâ cun i gnûfs zuiatui .

La mame Marie i à preparade la sô tortute: intun gucjarin une gote di mîl e une nole taiade intal mieç, cun parsore un fulminant par fâ di cjandelute.

Ma, par che la fieste e sedi pardabon biele e gustose, e je une robe che mancjie: no son alì altris fruts, altris amiis par podê zuiâ insieme: ce fieste di complean ise se no son i amiis dongje, cualchidun che al zuei cun te?

Stiefin, il papà pompîr, i veve ben preparât une biele taulute cul *Lego* e la mame Marie e veve metût parsore un façoletut come tavaie. Ator de taule Stiefin al à metudis lis cjadreutis e parsore al à sentât ducj i pipinuts cjatâts inte scjatule, comprinduts i Supererois, come *Batman*, *Spiderman* e *Superman*. Parsore de taulute la mame e veve picjadis une rie di bandierutis colôr arint, taiadis fûr cun pazienze di une cjarte di cjocolatins e dai piçui balonûts soflâts di ducj i colôrs.

Ma i omenuts dal *Lego*, cu lis lôr musutis zalis, no son di grande compagnie: no disin nuie: no cjantin, no balin, no si corin daûr e nancje no mangjin une fetute di torte. Ducj fers e sentâts su lis lôr cjadreutis!

Zuanut al jere daûr a stufâsi di chê fieste cussì flape, cuant che i è vignude une idee des sôs. Si è impensât che lui al veve ancje doi amiis vîfs, che magari no tabaiavin masse, ma almancul si movevin!

I doi a jerin Gjildo il pes e Çuf la parussule, un brâf a nadâ, chel altri bulo a svolâ.

"Cumò o meni Çuf a cjatâ Gjildo, cussi i mostri la sô cjase, e dopo o quarti Gjildo a cjatâ Çuf, cussi a fasin amicizie fra di lôr. Çuf al impararà a nadâ e Gjildo a montâ su la ale di Çuf e a svolâ cun lui. O stin ducj i doi parsore di chês alis, e ancjemò al vanze il puest par un pipinût di *Lego*"

Cussi Zuanut al à puartât l'ucielut, tirât fûr de sô scjatulute, dentri il vâs di veri plen di aghe par fâi cognossi Gjildo il pes. Il puar Çuf al si spacave dutis lis plumis bagnadis e nol jere propit bon di nadâ... par fortune che in chel moment e je jentrade Marie, la mame, par puartâ a Zuanut un regalût che i veve mandât la none: un uvût di cjocolate taiât tal mieç, tant che il frutin al podeve stâ dentri e lecâ su la parêt la cjocolate cu la lengute stant sentât.

"Ce fâstu Zuanut a chel puar ucielut?" - e à berlât la mame, tirant fûr dal aghe il frutin e la besteute -: " No viodistu che si innee?"

"Lu ai puartât jo, par che a fasin amicizie, cussi dopo Çuf al cjame su la ale ancje Gjildo e nus parte ducj i doi a fâ un svôl ator pe cusinel!"

Insome ai doi nemaluts ur è lade propit ben di contâle! Pensait ce brute fin che a varessin fate, Çuf inte aghe e Gjildo di fûr!

A la fin Çuf, par consolâ Zuanut, e come regâl di complean, lu à puartât in svôl ator par la stanzie, passant propit parsore dal vâs di veri dulà che al steve il pessut, e Zuanut lu saludave cu la man.

Gjildo ju cjalave cu la bocje spalancade.

6. Zuan Semençute al va a la scuele dai frutins

*Par cjatâ dai gnûfs amiis
che i fasedin compagnie
la matine prin des dîs
al va a scuele cun ligrie;
e à la mame la vafis
par chês oris che al è vie.
Ma nol è nancje rivât
che alc di gnûf 'l à cumbinât!*

Papà Stieffin e mame Marie cumò a jerin preocupâts. Chel dì de fieste dal complean a àn capît che il lôr frutin nol podeve stâ simpri dibessol, ni nol podeve vê come amiis dome un ucielut e un pes.

"Bisugne che al cognossi altris frutins" al à dit Stiefin, e Marie e à fat di sî cul cjâf: "Bisugne propit!"

"Alore mandinlu inte scuele dai frutins, che là a 'ndî cjatarà une vore!"

E cussì Zuanut al è jentrât inte scuelute dal so paîs: une biele costruzion, plene di lûs e di colôrs, cun tancj zuiatui pardut e un bon profum di robe di mangjâ che al rivave de cusine dulà che e lavorave la coghe Erneste.

La mame e à puartât a la maestre, che si clamave Luzie, dut chel che al coventave: un jetut piçul par che Zuanut al podès fâ un pisul dopo mangjât, il so piçul stchedint par ispirâ il cicin, il so taponût par bevî il lat e il so vignarûl par fâ la pipì.

Luzie e à scoltât cun atenzion dut e a la fin e à dit, fasint une biele muse di ridi: "No stait a preocupâsi, o viot jo di Zuanut e no gjavarai mai i vôi di lui ... ma, dulà isal lâ?"

Zuanut in fat al jere bielzà sparît!

La mame lu à cirut dentri la borsete e in te sachete, se mai si fos scuindut al par tornâ a cjase, ma nol jere ni ca ni là!

La maestre Luzie, cence scomponisi, e à clamât dongje ducj i fruts e ur à dit: "Cumò, scoltaitmi, o fasin un biel zuc gnûf! Chel di cirî un frutin che si clame Zuanut Semençute, un gnûf amì che al è piçul come un pipinut di *Lego*. Cui che lu cjate al varà par premi cheste biele pavee di cjarte che us ai preparade par contâus vuê la storie des paveis e dai cavalfîrs!"

Ai fruts no ur pareve vere, di fâ chest biel zuc gnûf, e ducj si son metûts a sgarfâ pardut: intal zei dai zuiatui, intal armâr dai cuadernis, intal podenut dai penarêi ... fin intal scansel des fuarpiutis e de cole, dulà che dome i plui grancj a podevin meti la manute.

Un di lôr al è lâ a cirilu intes padielis de cusine, un altri al à cjalât dentri il vater, un altri ancjemò inte scovacere... ma nuie!

La mame Marie cumò e jere preocupade, ancje se jê e jere zaromai usade a viodi sparî il piçul cuant che al jere in cjase, ma la maestre Luzie e jere invezit contente di viodi ducj i vincjecinc fruts che si davin da fâ cun tante passion.

Però la robe e diventave lungje e la maestre Luzie e scomençave a gratâsi il cjâf un fregul pinsirose...

Gratant e à sintût alc di dûr intai cjavei e subit dongje une straludade... ma ce jerie mai chê curumbule parsore dal so cjâf? Une curumbule che e straludave?

Planc planc e à tirât jù la man dai cjavei e cui no aie cjatât dentri la man?

Sì! O vês induvinât! Al jere propit lui, Zuanut, che si veve platât là parsore e che, cul stâ intai cjavei de maestre i veve vignude pice intal nâs e par chel al straludave come il mus te semule!

Cussì i frutins del scuelute a àn cognossût il gnûf compagn di zucs che la maestre e tignive in man, e ducj i àn a colp volût ben,

Zuanut al è diventât il lôr plui grant amì, e ducj a fasevin la gare par dâi un fruçon de lôr mirinde, tant che Zuanut al veve simpri la panze plene.

Il zuc di lâ a cirilu ator par la scuele e je diventade la plui bele ativitât de zornade, e la fasevin ogni dì.

La maestre Luzie, di chê volte, si tignive simpri sul cjâf une scufe di lane rosse cul pompon.

E cussì cualchi volte Zuanut si scuindeve framieç des glagns di lane dal pompon.

7. Une gnove amie

*Al è amì cun ogni frut,
 une biele compagnie
 al starès tant ben Zuanut
 in chê scuele, ce ligrie!
 Ancje alì 'l è un alc di brut
 ma lu pare la sò amie:
 Ni Chechìn e ni Checòn
 plui no i fasin sudizion!*

Si sa che cuant che si cjatin i gnûfs amîs , al capite che cun cualchidun di lôr si devente plui amì che no cun cualchidun altri.

Tant e je vere che se si barufe cun chest grant amì, la prime robe che si dîs e je simpri: "No tu sês plui gno amì!" e cheste e sarès la piês disgracie! Di bon che, par solit la barufe e dure pôc, e si torne simpri amiis come prime, se no di plui.

Ducj i frutins de scuele a volevin jessi grancj amiis dal nestri Zuanut, e lui al jere amì cun scuasit ducj lôr, ducj fûr che no cun doi zimui dal grop dai grancj che si clamavin Chechìn e Checòn.

I doi birbants i fasevin simpri bruts scherçs, come cuant che lu taponavin sot di une tace di veri e il puar Zuanut al cirive di bant di saltâ fûr di lì, o come cuant che i soflavin intôr cuntun frôs di chei che si doprin par bevi il struc di pomis, fin a fâlu ribaltâsi cul cûl par aiar, o ancjemò cuant che lu metevin intune busute che a fasevin cu la paletute intal ortut de scuele, e dopo i strucjavin parsore un sborfedôr plen di aghe par bagnâlu dut.

I frutins di chê scuclut a stevin dispes di fûr, bastave che nol plovès: alì a vevin fat un biel ortut dulà che lis maestrîs, Luzie e Veroniche, ur insegnavin a cognossi lis plantis e i lavors di fâ in campagne.

Dome che i doi zimui, Chechìn e Checòn a pene rivâts di fûr a tormentavin il puar Zuanut.

Ma par fortune inte scuele e jere ancje une frutine, di non Fatime, che e tignive simpri i siei voglons neris pontâts sui doi galups, e cussì e rivave simpri di corse a salvâlu e a liberâlu des lôr sgrifis: e alçave la tace dulà che lu vevin metût dentri par fâlu saltâ fûr, lu jevave sù cjapantlu par la manute, cun biele gracie, cuant che al jere stât ribaltât cuntune soflade, lu tirave fûr de busute intal ort prime che Chechìn e Checòn a rivassin cul lôr sborfedorut plen di aghe, e svelte svelte e taponave la buse cul pidut.

Fatime e jere une dai miezans, che e rivave la matine cu la none, simpri cuntune biele gale colôr di rose su lis strecis neris e , sul di plui e veve une

biele vôs e la doprave dispès par cjantâ des bielis cjançons e ducj i batevin lis mans.

Jê e zuiave cun Zuanut tratantlu cun tante delicatece, dividint cun lui une mentute che e rompeve cui dintuts, o pur involucantlu intune cjarte di caramele a colôrs, o contantgj tantis robis che il frutin al steve a scoltâ stant sentât suntune bncjute che Fatima i veve fat cuntun stecut di gjelât poiât su doi claputs.

Cuant che e viodeve che Chechìn o Checòn, o ducj i doi insieme, si svicinavin par fâi cualchi dispiet a Zuanut, di corse lu cjavave e lu platave inte sachetute dal grimalut, cjairecantlu sul cjaf cu la ponte di un dedut.

Une dì a Chechìn i jere vignût un grant rafredôr e i gotave di continui il snacai jù dal nâs: ce no aial pensât alorûe chel birichin? Di lâ a cirî Zuanut par sgnofrâi il snacai intor e sporcjalu dut!

“Fatima âstu viodût dulà che al è Zuan Semencute che o volin fâi un biel regâl?” al domandave Checòn che nol viodeve la ore che so fradi al fasès chel brut scerç.

Ma Zuanut al steve ben platât inte sachetute di Fatime!

Par un pêl no si faseve scuviergi, par vie che drenti la sachete e jere lade un pocje di polvâr e a lui i vignive di tossi.

La frute e à dit une bausie: “No che no lu ai viodût!” - e intant cul dedut in te sachete e tignive sierade la bocje di Zuanut che no i scjampàs la tos.

In chê e je rivade dongje la maestre Luzie par clamâ la frutine: “Fatime e je vignude la none a cjoliti, tu âs di lâ a cjase daurman, che la mame ti spiete”.

Fatime no podeve sigur no tirâ fûr de sachete Zuanut, alì, propit denant dai zimui, e cussì lu à puartat vie cun jê.

“O telefonarai a la tô mame che tu sês a cjase mê”: i à ciscât metintsi su la gjachetute colôr di rose parsore dal grimâl.

Cussì, cun cheste gnove amie, Zuanut al è partît del scuele e al è montât su la machine de none di Fatima.

Ducj i fruts a scuele a crodevin che, come il so solit, Zuan Semencute al si fos scuindut di cualchi bande e si son metûts a cirilu par dut, come che a jerin usâts.

Ma cheste volte al jere di bant!

Intant Chechìn no la finive plui di sgnofrâsi il nâs, e si veve sporcjat pardut cul so snacai.

8. Al supermarcjât

*Biei colôrs e bon profum
achì intal Supermarcjât!
A Zuanut i pâr un sium
che nol jere alì mai stât!
Si à cjalât ator un grum*

*e intant si è niçulât!
Ma a la fin, grande sorprese,
cui che al cjate a fâ la spese?*

La cjase dulà che e steve Fatime e jere pluitost lontane, la ultime dal païs. La none e voidave cun tante prudence e stant atente a ducj i segnâi stradâi. Si fermave cuant che il semafor al jere impiât cu la lûs rosse o zale, si fermave se cualchidun al veve di passâ cjasminant su lis strichis, si fermave se par tiere al jere scrit "STOP", insumis si fermave une vore dispes, e cuant che no jere ferme e leve biel planc planchin par no meti in pericul la gnegute.

Nissun al fevelave par no che la none si distraès, e cussì Fatime, che un pôc si stufave, si è indurmidide sul so cjadrein, e subit dopo si è indurmidît ancje Zuanut, drenti la sachetute dal grimâl de frute.

Cuant che finalmentri a son rivâts a cjase di Fatime, la mame de frutine, che si clamave Karima, e jere za pronte che la spietave par lâ a fâ la spese, dal moment che i mancjavin une vore di robis in cusine par preparâ la cene.

"Stâstu tu a cjase cun Fatime" - e à domandât Karima a la none - "che jo o voi a fâ la spese, che mi mancjin une vore di robis par preparâ la cene?"

"No che no puès" - e à rispuindût la none - "cumò o scugni lâ a cjase daurman, che o ai lassât Bepût di bessôl e o ai pore che no mi fâsi la pipì sul tapêt".

Bepût al jere il so cjanut, blanc e neri e dut pelôs, ma un fregul môl di suste.

"Po ben valà" - e à rispuindût Karima - "alore la puartarai vie cun me. Lassile che duarmi e metile su la mê machine"

Cussì cumò Fatime, simpri cul nestri Zuanut inte sachete dal grimâl, e je sentade sul cjadrein de machine rösse de mame.

E duar come un agnulut e si insumie di vê denant une biel scudiele di lat clip cul zucur, tant che, durmint, si supe i lavris.

Zuanut invezit si è dismot: il polvar che Fatima e veve inte sachete cumò i fâs efiet, tant che al mole un potent colp di tos e une straludade e Fatime si dismôf ancje jê e e vierç i vôi e ju sfreole.

Karima, sintint il colp di tos e la straludade, e crôt che sei stade la frute e i dîs: "Âsti cjàpât il rafredôr? Cuant che o sin a cjase ti fâsarai bevi une tace di lat clip cul zucur, e ti passarà dut!"

Fatima no conte che il sunsûr lu veve fat Zuan Semençute, par no che la mame i cridi come in chê volte che e veve puartât a cjase dal asîl un orsut che i plaseve.

La none, in chê volte, i veve dite: "No si cjape sù la robe di chei altris, doman tu âs di tornalu!"

La none di Fatima e veve simpri reson jê!

Intant la machine e je rivade alî dal Supermercjât; la mame e cjôl sù un carel e Fatime, come simpri, e vûl pocâlu jê.

Zuanut, cidin cidin, par viodi dut, si jere rimpinât fin sul cjâf di Karima e cumò si niçulave dut content sentât suntun rincjin.

In fat Karima e puartave sulis orelis doi grancj rincjins di aur in forme di cerclûts, e al nestri Zuanut no i pareve vere di vê cjatât là parsore un niçul cussì biel e lusint.

Zuan Semençute nol jere mai stât intun Supermarcjât, par vie che la sô mame Marie e veve pôre che si sarès imbusât cuissà dulà, e dopo cui lu cjatavial intal mieç di tante marcjanzie?

Il nestri frut si niçulave su la orele di Karima e al cjalave incjantât dut chel ben di Diu.

Colôrs di ogni sorte intal banc de verdure, cui pomodoros ros, i cudumars verts, lis cocis zalis il lidric ros, blanc e e vert come la bandiere, i narançs narançon, e lis sespis blu e viole...

Prufums di ogni sorte e saltavin fûr dal banc dal formadi e dai salums, e plui ancjemò dal banc dal pan a pene vignût fûr dal for.

E ce dî dal incjantament de lungje rie di caramelis, biscots, bonbons e cjocolatis?

Zuanut al nasave a plen nâs, al cjalave cui vôi spalancâts, al gloteve la salive plen di gole che dutis chês robis i fasevin vignî.

Ma un banc i à fat une grande impression: chest al è stât chel dal pes, dulà che a stevin poiâts ducj in rie, un dongje di chel altri, tancj persons inte glace.

Al piçul Zuanut i someavin dai mostris grandissins, che i fasevin propit pôre cun i lôr vôi spalancâts, taronts e frêts, ma soledût cun chei dincj che podevin fruçâlu e po glotilu intun bocon, se lu vessin brincât, altri che il so amî Gjildo, il pessut ros e picinin che al nadave cun lui intal vâs di veri!

Furtune che i pes no si movevin e a stavin dûrs e fers inte lôr glace!

Fatime e cjalave in sù, viers il so amî e intant e riduçave viodint che sô mari no capive parcè che une orele e pesave plui che no chêt altre e un rincjin al si moveve sù e jù.

La frute e jere judiziose, e sburtave cun atenzion il carel, par no lâ intor de int e no faseve mai chei capriçs che par solit a fasin i frutins intun negozi, dulà che dut ur fâs gole e che a domandin dut ce che a viodin.

Però in chêt volte e à insistût a lunc cun la mame che i compràs un uvut di cjocolate, di chei involuçâts inte cjarte stagnole, cu la sorpresute dentri.

Fatima no lu voleve nome par sè, ma e pensave che, magari, e varès cjatât dentri alc par zuiâ cun Zuanut, come magari un poleçût o un cuninût di plastiche.

La mame un fregul si smaraveave di sintî la sô buine fie che e insisteve "Comprimi un uvut mame! Ti prei!": ma, come ducj i gjenitors, a la fin le à contentade, pensant che i capriçs a fossin colpe dal rafredôr.

"Puedio vierzilu cumò?" e à domandât Fatime

"No, tu lu viergis a cjase. Prime bisugne lâ a paiâlu in casse!" -i à rispuindût la mame, intant che cu la man e cirive di fermâ chel rincjin che al continuave a movisi sù e jù.

Cuant che a jerin rivâdis cul carel a ret dai bussulots dai fasûi e dai cesarons, a àn viodût a rivâ di chêt altre bande une femine e un om cul carel plen.

Si son saludâts cun Karima, e la femine e à fat une cjarece sul cjâf di Fatime.

"Mandi, mame! O soi ca sù! Ce biel che al è il Supermarcjât!" : in chel si è sintude la vôs di Zuan Semençute che al saludave cu la man ,intant che cun chêt altre si tignive dûr intal rincjin.

Infat chel om e chêt femine che a vevin incrosâts e che a fasevin la spese a jerin Stieffin e Marie, i gjenitôrs di Zuanut!

"Ma Zuanut ce fâstu alî? No sêstu a scuele?"

A Fatime i à tocjât di contâ dute la storie, scomençant dai dispiets di Chechìn e Checòn, fin al uvut comprât par zuiâ cun Zuanut.

Dentri di chel uvut, che, dopo vêlu paiât, a àn rot alî stant ducj insieme, al jere un cjavalut celest e Zuan al è montât parsore dut content, supant un cjantonut di cjocolate, intant che Fatima e mangjave il rest.

9. Zuanut al va al mâr

*Ven l'Istat, no je plui scuele
ducj a van in mont o al mâr:
pai frutins e je tant bieles
la stagjon che il cîl 'l'è clâr!
No si scugne plui stâ in cele
no si met plui sù il grimâl!
Ma ancje in splage il nestri Zuan
al cumbine il so malan!*

Intant al jere vignût l'Istat, lis zornadis si jerin slungjadis e il soreli al scjaldave une vore dut il mont.

La scuele cumò e jere sierade e i frutins a levìn in vacance cui gjenitors, o ben a stavin dut il dì in zardin dentri une piçule vascjute plene di aghe cun dome lis mudandis intôr.

I gjenitors di Zuan Semençute, Stiefin e Marie, a jerin diventâts amîs cun chêt di Fatima, Kemal e Karima e a fasevin dispes cualchi gjte ducj insieme.

"Anin al mâr insieme cun Fatima!" - al à domandât une buinore il nestri frutin - " E o puartìn ancje il pessut Gjldo a nadâ inte aghe fonde!"

" Buine idee " - e à rispuindût la mame - " Cumò o domandi a Karima se i va be ancje a jê. Ma Gjldo o vin di lassâlu a cjase, par vie che nol pues lâ inte aghe dal mâr che e je masse salade!"

Kemal, il pari di Fatima, e Stiefim, il pari di Zuanut, in chel dì a vevin di lâ a vore, ma lis dos feminis a jerin libaris, e cussì a son partîts cu la machine viers la splaze dal mâr.

Marie e vuidave, dongje di jê e jere sentade Karima e intes sentis daûr e jere sentade Fatima, leade cu la cengle suntun cjadrein cun dongje Zuanut poiât parsore une glagn di lane e leât cuntun elastic dentri mieç uvut di cjocolate, come che al fos lui la sorprese!

La zornade e jere tant bieles che Fatima si è metude a cjantâ une cjante imparade a scuele, e lis maris i son ladis daûr: propit un biel côr.

Intant Zuanut al distacave a planc cualchi tocute de cjocolate dal ûf e lu supave dut content.

Cuant che a son rivâts alî dal mâr a àn poiade jù la machine, si son cambiâts di vistîf e a son jentrâts su la splage.

Fatima e veve un costumut celest, come che al jere il cîl in chel moment, e Zuanut un par di mudandins zâi, come che in chel momente al jere il soreli. Ce tant che i doi frutins a àn zuiât intal savalon! E ce tant che a àn tabaiât lis dôs maris fra di lôr, dant dome ogni tant une cjalade par tignî di vôi i fruts, e plui di dut Zuanut!

Fatima cul seglotut e cu la palete e faseve i cjastiei di savalon, e Zuanut al jentrave dentri propit come se al fos un cjistiel vêr; dopo la frute e faseve une piste par fâ cori lis balutis di plastiche, e Zuanut al coreve dut content su la piste, plui svelto che no lis balutis.

Par fâlu lâ inte aghe a fâ il bagn cence jessi puartât vie di cualchi onde, par Zuanut il papà Stiefin al veve fate une barcjute di cjarte, pleant un sfuei di cuaderni, e la mame, par no che al fos menât vie, i veve leât intor de panzute un fil di lane lunc lunc, e lu tignive cu la man tant che un acuilon di chêi che a svolin intal cîl.

A Zuanut i plaseve une vøre di jessi niçulât dalis ondis, che a fasevin lâ sù e jù la barcjute di cjarte dulà che al steve sentât tant che un pape.

Par no scotâsi sot dal soreli, dopo vê fat il bagn, lis feminis si jerin metudis dutis trê sot di un grant ombrenon a riis blancjis e rossis: par Zuanut Fatima e veve puartade invezit une ombrenute di cjarte celeste, di chês che a metin sui gjelats.

Ma Zuanut nol steve mai fêr a sotet, e al coreve ca e là dut il timp, fin che a un biel moment no lu àn viodût plui.

"Come simpri chest benedet frut al sparîs" - e à dit Marie - "Cumò tocje cirîlu in dute cheste confusion di int! Sperin dome che nol sei tornât inte aghe cence il fil di lane, che cumò lis ondis a son altis!"

Nancje Fatima no capive dulà che il frut al podeve jessi lâ: un moment prime al jere montât su la pacarute di plastiche che a vevin puartât par zuiâ cul savalon, e un moment dopo no si lu cjatave plui!

Cîr che ti cîr, a la fin a son ladis a visâ chei de plage che si veve pierdût un frutin, cu lis mudandutis zalis.

Cussì a àn scomençât a clamâlu cul microfon: "Cui che al viôt un frutin une vøre piçul culis mudandutis zalis, che lu puarti alî de so mame che lu sta cirint!"

Dute la int si à metude a cirîlu: a cirivin di viodi un frutin cu lis mudandutis zalis, ma no savevin trop piçul che al jere Zuan Semençute e trop difil che al jere di rivâ a viodilu!

A un ciert moment Fatima e à dîit: "Cjale che cape! si môf e e va indenant di bessole!"

Karima i dîs " E varà dentri une besteute, no sâstu che a son des besteutis che a vadin a stâ dentri di une cape?"

"Sì, lu sai, si clamin pagûrs e a àn dîs çatutis.. ma sot di cheste cape e je une besteute che e à dome dos gjambutis e un par di mudandutis zalis!"

E cussì a àn cjatat Zuanut che si veve scuindut dentri une cape e che si divertive, ridint come un mat, a viodi che ducj lu crivin come i fruts inte sô scuele.

Tornant a cjase al jere ancjemò che al rideve

10. Zuan Semençute al va intal bosc.

*Par Zuanut vuê ce armonie:
stâ cun Çuf e cul papà!
Cheste bieles compagnie
fin tal bosc e rivarà.
Ma si romp la lôr ligrie:
che un falcuç ju vûl mangjâ...
Par fortune che Zuanut
al comede simpri dut!*

La robe che i plaseve di plui a Zuanut e jere chê di lâ intal bosc cul papà Stiefin e cul ucielut Çuf, che spacantsi lis plumis, al saltave fûr dut content de scjatule dulà che lu tignivin a durmî.

Al frutin i plaseve di lâ a cjalâ i foncs stant sot il lôr cjapiel, di rimpinâsi suntun claput tant che su une montagne alte, di platâsi inte jerbe alte e di bagnâsi la musute cu la sô rosade, di nasâ il profumo dai ciclamins tirantju jù fin dongje dal nasut.

Al cjaminave svelt daûr des scuadriis des furmiis che, stant in rie, a puartavin culis çatutis i gragnei di semence che a vevin cjatâts, o pûr al montave a cjalâ di cualchi gri fin che chest, dut smaraveât, nol jentrave inte sô busute.

Ogni tant Çuf lu cjamave sulis sôs alutis e lu puartave par aiar, a cjâla il bosc di parsore in jù.

"Cumò ti mostri la mê cjasute" - i à dit l'ucielut - (in veretât Çuf nol fevelave se no cun siviladis, ma si faseve capî benon dal frut)

Cussì il frutin al è montât su la schene di Çuf e chel al è partît viers un cjastenâr, che al veve parsore di un ramaç un biel nît fat di stecuts e di paltan. Il nît cumò al jere vueit, ma dut plen di plumutis piçulis piçulis, lassadis alì dai ucieluts che a jerin nassûts alì dentri.

Zuan Semençute al è dismantât jù di Çuf par viodi ben chê cjasute dulà che al jere nassût il so amì... ma: "Ce disordin!" - e varès dite la mame Marie -

No dome plumutis, ma ancje tocuts di ûfs rots, di cuant che i ucieluts, Çuf e i siei fradis, a jerin saltâts fûr rompint cul bec l'uvut che ju veve tignûts dentri e parfin cualchi sbitut che Zuanut al steve atent di no pescjâlu.

"Ca al jere il gno ûf, che la mê mame e tignive cjalt sot di jê intant che il papà al svolave pardut a cirî alc di mangjâ par dute la famee" - al mostrave Çuf cul bec il puest just e Zuanut al à provât a sentâsi alì par viodi cemût che al podeve stâ il so amì sot de ale de sô mame.

Ma dut intun moment il soreli al è stât taponât di une ombrene scure e frede intant che si à sintût a colp un grant sunsûr di alis grandis che a batevin.

Çuf al à scomençât a trimâ: "Il falcuç! Il falcuç! O mame mê! Svelt, scjampìn se no nus mangjie! Monte di corse su la mê schene che o svolin vie!"

Il falcuç al jere propit grant, al veve un bec grandissin e spiçât, e doi vôi che a cjalavin di brut.

Par dî la veretât chel ucielon al veve une grande fan intor, par vie che in dute chê zornade al veve mangjât dome une piçule surisute e doi zupetuts e cumò

al pensave di jemplâsi il stomi cun chel ucielut che al jere in chel nîf e cun chel piçul frutin che i steve dongje.

Çuf al à cjapât il svôl, e vie di corse cun Zuanut su la schene, ma il falcuç cun chês alonis grandis al svolave ce tant plui svelt, e po lu sburtave la fan!

Ma cuant che al jere rivât bielzà a pat dai doi, il papà Stiefin, che fintremai in chel moment al jere daûr a cjapâ su legnuts par impiâ il fûc a cjase sô, al à alçâts i vôi, sintint Çuf che al zornave e Zuanut che al clamave: "Papà, papà, judinus!"

Ma i doi che a scjampavin e il falcuç che ur coreve daûr par brincâju, a jerin masse lontans e il papa Stiefin propit nol rivave nancje a viodiju, ma dome a sintîju.

Alore Zuanut al à pensât: "Cumò bisugne che mi rangji di bessôl!" e al à dit inte orelute di Çuf: "Sbassiti jù plui che tu puedis, che jo o cjapi su une robe" L'ucielut si è sbassât fin scuasit par tiere e Zuen Semençute svelt al à cjapade su une puiese che e cjaminave cence un pînsîr suntune fuee di cjastenâr colade par tiere.

"Cumò torne su!" - al à ordenât il frutin tignint la besteute verde cun dutis dôs lis mans.

Cuant che il falcuç si à fat dongje e al à spalancât il bec par gafâ intun colp Çuf e Zuanut, chest al à svelt molade la puiese che e je svolade dentri la bocje dal falcuç.

"Ce puce! E ce robe triste!" al à pensât il falcuç sierant il bec e cirint di spudacjâ vie chel trist bocon.

Cussì i è vignût ancje il sangluç e al è svolât vie simpri spudacjant.

Intant il papà Stiefin, che si veve preocupât une vore sintintsi a clamâ, al jere finalmentri rivât a viodi i doi che i son passâts svolant ator di lui.

"Mi clamavistu Zuanut" al à domandât l'om.

"Nuie, nuie, dut ben!" al à rispuindût Zuan. "Spiete che cumò o tornin jù."

Ma in veretât lui e Çuf a vevin cjapade propit une biele pôre, viodint il falcuç che ur coreve daûr!

Tornant a cjase a àn simpri tasût. Çuf al steve cucjo cucjo inte sô scjatule, e Zuanut si jere indurmidît intal sachetin de cjamese dal papà, propit dongje dal so cûr che i deve tant coragjo.

11. E ancjemo tantis storiis

*Us salude cumò Zuan
e si polse un momentin
biel che al pense a un gnûf malan
par fâ simpri il birichin!
Lui nol passe un dì dal an
cence un fregul di morbin!
Gnovis storiis a'ndi è un sac
contait voaltris, ch' jo soi strac!*

E in chê volte che Zuanut al è lâ t a viodi i nemâi dal zoo e che lu àn cjatât dentri il nâs dal elefant?

E in chê altre volte che al è lâ t in montagne cui siei piçui schi e che il papà Stiefin i à fate une cjasute di nêf?

E in chê volte che al è stât cu la mame Marie che e veve di comprâsi lis scarpis gnovis e che Zuanut si è platât dentri di un stivâl?

E in chê volte che al è stât a la fieste di complean di Fatima e che nissun lu cjatave fin cuant che al è saltât fûr de torte dut sporc di cjocolate?

E in chê volte che al è stât dentri di un orloi a cucù e che al saltave fûr su la schene dal ucielut cuant che e bateve la ore?

E in chê altre volte che...

Bon: o vês capît che Zuan Semençute al jere propit une ligjere, un vêr birichin e che a'ndi à cumbinadis une par colôr!

Ma cumò no stoi a contalis dutis jo: provait a pensalis e a contalis di bessôi!

Cussì o fasarês ancjemo plui amicizie cun chei frutin tant piçul ma tant simpatic che al è il vuestri Zuan Semençute.

FIN